

## ALAHADY FAHA 22 MANDAVANTAONA - B



***“Tsy ny zavatra avy any ivelany miditra ao anatin’ny olona no mahaloto azy, fa izay mivoaka avy ao anatin’ny olona no mahaloto azy » (Mk. 7: 15) “***

Ry Kristianina havana, raha nifaranantsika tamin’ny Alahady faha 21 tsotra mandavantaona lasa teo ny fandalinana ny evanjelin’i Md Joany 6 dia ny fandalinana ny Eokaristia miainga avy aimn’ny famantarana nataon’i Jesoa tamin’ny fampitomboana ny mofo ka nanambarany fa Izy tokoa no Mofon’aina mahavelona sy Rà loharano mamelona antsika ka izay misotro ny ràny sy mihinana ny nofony dia hanana ny fiainana mandrakizay. Maro ny tafintohina fa i Piera sy ireo apôstôly namany kosa nisafidy sy natoky fa i Jesoa no tena Teny mahavelona. Tsy maintsy misafidy isika eo amin’ny fiainantsika raha hanaraka an’i Jesoa tanteraka ka mivelona izany Teny mahavelona izany ary izany no atao hoe fanompoana. Nohalalinintsika izany tamin’ny filankevitra pastôraly ka tsy maintsy mikatroka isika eo anivon’ny fikambanana masina, ny firohotana ary indrindra manompo amin’ny alalan’ny vaomieran’asa maro isankarazany izay anehoantsika fa isika izao no i Kristy mpiara-belona amin’olona ka mahatonga antsika ho taranaka Mpanorina E. O. V sy E. T. A..

Vakiteny I : Det. 4, 1-2. 6-8

Tononkira : Salamo 14

Vakiteny II : Jak. 1, 17-18. 21b-22. 27

Evanjely : Mk. 7, 1-8a. 14-15. 21-23

Amin’izao Alahady tsotra faha 22 mandavantaona izao dia miverina amin’ny Evanjelin’i Md Marka isika izay vakiana mandritra izao taona B izao ka mifanojo tsara ary manohy ny fampianarana nataon’i Jesoa nohalalinintsika mikasika ny Eokaristia. Tsy maintsy manara-dia azy isika ka izany

indrindra ny lohahevitra aroson'ny Eglizy androany : “Tsy mora tokoa ny manaraka an’I Jesoa” fa tsy maintsy mitondra ny hazofijaliana, tsy maintsy misy fijaliana, izay no mahatonga antsika milaza fa tsy Bac+ ny fanarahan-dia an’i Kristy fa Bac- izany hoe ireo mamatopatotra antsika, izay manakorontana ny fiaianantsika dia tsy maintsy diovin’ny Fanahy Masina satria ny Fanahy masina dia mpanarina, mpanadio. Ambaran’i Jesoa amin’ny Evanjely izany mba tsy fanajana amin’ny molotra fotsiny no atao fa amin’ny fiainana manontolo sy amin’ny andavandrom-piainana. Tsy ny fomba no ratsy fa ny fanaontsika no matetika mifanohitra amin’izany fomba izany satria raha tena fomba marina dia mikajy mandrakariva ny soatoavina araky ny naharian’Andriamanitra antsika izay nohariany hitovy endrika aminy ny fomba. Ny fomba dia atao hivelomantsika ny maha endrik’Andriamanitra antsika satria na firenena inona na firenena inona dia efa noharian’Andriamanitra hatramin’ny voalohany fa ny fanao vokatry ny fahotana no matetika manakorontana izany faharian’Andriamnaitra antsika mitovy endrika Aminy izany. Ny fanaontsika vokatry ny maha mpanota antsika no manimba ny fiainantsika ka izany no ambaran’i Jesoa amin’ny Evanjely androany mba hiverina amin’ny laoniny ny zava-drehetra ary izany rahateo ny antondian’i Jesoa eto an-tany, fahasoavana ho antsika izany ka aoka tsy asiana fihatsaram-belatsihy ny fanatanterahintsika ny fomba fa arak’izay fanajana ny soatoavina dia ny fifanajana no fototra ary ao anatin’izany dia ny fanajana ny aina no voalohany indrindra sy ny fanajana ny hafa.

Aoka ny fontsika ho fo vaovao ary izany ny mahatonga an’i Jesoa nilaza fa io fontsika io no manimba ny fifandraisantsika. Tsy ny zavatra avy any ivelany miditra ao anatin’ny olona no mahaloto azy hoy Jesoa fa izay mivoaka avy ao anatin’ny olona no mahaloto azy dia tanisain’i Jesoa ireo zavatra mahatonga fahalotoana ao ampontsika ao dia ny fakambadin’olona, ny fijanganjangana, ny famonon’olona, ny halatra, ny hafetsen-dratsy, ny hasomparana, ny fijejojejoana, ny adalana isankarazany. Fantantsika tsara ireo fa vokatry ny maha mpanota antsika ary manimba ny fiainantsika. Raha te ho taranaka mpanorina tokoa isika dia tsy maintsy mandresy an’ireo ka miditra amin’ny fiainam-baovao, izany koa no irintsika ka angatahintsika ny Fahasoavan’Andriamanitra taorian’ny filankevitra pastôraly ka ho fo vaovao ny fontsika mba tonga taranaka mpanorina isika.

Matetika isika mamerina fa ny tanànantsika, ny diosezintsika, ny tanidranzantsika dia mila fo diovin’Andriamanitra, fo manao ny sitrak’Andriamanitra, manambara izany ny vakiteny voalohany amin’ny boky Deteronomy mba hanana fo vaovao ka amin’izay ho vahoaka hendry sy manan-tsaina isika *“Vahoaka hendry sy manan-tsaina tokoa io firenena lehibe io!” Fa iza tokoa moa no firenen-dehibe hanana andriamanitra akaiky azy, tahaka ny maha-akaikintsika ny Tompo Andriamanitsika isaky ny iantsoantsika Azy? Ary zovy no firenen-dehibe manan-didy amam-pitsipika marina, toy izao lalàna ataoko eo anoloanareo anio izao?”*

Ny vakiteny faharoa dia i Md Jakoba no mananatra antsika fa ny fanatanterahana ny sitrak’Andriamanitra izany hoe mitoetra ao amin’i Jesoa sy itoeran’i Jesoa isika no hahahtonga antsika hihavao ka hanova ny fontsika. Ny hahafantarantsika izany dia isika manao soa ka mikatsaka mandrakariva ny soa iombonana, manatanteraka ny sitrapon’Andriamanitra dia isika mikarakakara ny hafa sy manasoa ny hafa. “Manampia ny kamboty sy ny mpitondrantena” izany hoe miezaka mandrakariva manao ny sitrak’Andriamanitra amin’ny fiainantsika, izany ny finoana arahin’asa sy fitiavana tsy ambava intsony fa tanterahina amin’ny fiainantsika *“zao no fivavahana madio sy tsy misy tsiny eo anatrehan’Andriamanitra Ray: ny manampy ny kamboty sy ny mpitondratena amin’ny fahoriany; ary ny miaro tena tsy ho voaloton’izao tontolo izao.”*

Ry Jesoa Tompo ô ampianarinao tokoa izahay amin'izao làlana izoran'ny tanora hamonjy ny JMJ izao, mba tsy ho ambava fotsiny fa amin'ny fiainanay manontolo no hivelomanay ny finoana. Ovay ny fonay mba ho fo hitoetra araky ny fonao ny fonay amin'izay ny ataonay rehetra dia handresy ireo zay hitady hanapotika anay, mba ny fiainanay manontolo no fanatanterahana ny sitrak'Andriamanitra handresenay ny fihatsaram-belatsihy araky ny fomba matetika ataonay ka mahatonga ny fiainanay sy ny fifandraisanay simba. Teny mahazatra ataon'olona ny hoe tsy ny tany no fady fa ny vavan'olona, dia manao izay tsy mendrika izahay, ampio ny konsiansinay, ny maha izahay anay mba hifanaraka tokoa amin'ny maha zanak'Andriamanitra anay.

Ry Jesoa Kristy Tompo ô, marina tsy ho tratranay olombelona ny fahalavorariana ambaranao, ampio izahay hiezaka mandrakariva handresy ny ratsy amin'ny alalan'ny tsara, hiaina ara-pitiavana, ara-pahamarinana, hampanjaka ny rariny sy ny hitsiny, hikatsaka ny soa iombonana, hifanasoana ary indrindra hanampy ireo izay sahirana manodidina anay na sahirana ara-panahy na ara-tsaina na aranofo izy ireo. Ampio izahay mba ho Kristy mpiara-belona amin'ireo manodidina anay mba ho tena taranaka mpanorina tokoa. Enga anie ny fivavahana ataonay mba haninteraka ny fiainanay manontolo fa indrindra ny fankalazanay ny Eokaristia mba hahatonga anay hanana fiainana eokaristika ka hitoeranao ao aminay ary izahay hitoetra ao aminao ka hamokatra be eo amin'ny fiainanay izahay ary ho feno fiadanana sy hafaliana miaraka aminao. Amen

Mompera Arseveka Mgr Benjamin Ramaroson